

“Cietyihfan” Mulajucz:

Daegsaek Gagmiz Nauhyied Hoenghhwd

独具特色热烈隆重的仫佬族依饭节

□ 马志华 ingj/sij



▲ Vwnzva ndawbiengz Mulaj iengi, baijiyenj geij yiengh raen geizheih.

Mulajucz dingz lai comz youq gih raeuz Lozcwngz Mulajucz Swciyen, gaxgonq saeng lai cungj saenzbaed, ngoenzciet haemq lai, ndaw bi he cawz ndwencib, ndwenit le, gizyawz moix ndwen cungj miz ngoenzciet, ndawde suengq “cietyihfan” gek sam bi hoengh banh, moix bi saeq banh mbat he haenx cei miz daegsaek cei hoenghhwd, miz gij eiqsei mbaenj saenz gyaep sez, bauj bingzan comz fukfaenh, hoh gohaeux funksou, dwg aen ciethieq conzdungj Mulajucz gagmiz ndeu, daiq miz gij cingzduh gyo’mbaiq aencingz caeuq simmuengh haenqhwd.

Riuznaeuz ciuhgonq ranghdieg Mulajucz nyaenyak guhhaiah youq-gaenj, daegbied dwg nyaenvuengz — saeceijsaenz engq yak lai, haih vunz gwn doenghduz, soemx gomiuz daemh reihnaz. Vunz Mulajucz cingq mbouj rox baenzlawz guh seiz, miz dah sau Maxhau ndeu daeuj lo, de rengz ak raixcaix, aeu naq nyingz duz saeceijsaenz dai bae, gouq le gyoengqvunz, caemhcaiq daj ndaw conghbak duz saeceijsaenz dued aeu haexceh dauqma hawj gyoengqvunz, lij aeu lwgbiek, lwgmaenz deu baenz duzcwz duzvaiz bang gyoengqvunz dawzcae dawzrauq, son gyoengq daegmbauq Mulajucz dwknyaen. Daj seizhaenx hwnj, ranghdieg Mulaj rumz dingh fwn yinz, gohaeux funksou. Vih geiqniemh gij goenglauz sau Maxhau, moix baez roeb daengz bi’nyinh ngoenz laebdoeng gonq-laeng, vunz Mulajucz couh baenz mbanj roxnaeuz ndaw “doeng” (coengcug) doxcomz guh caeqbaeq, daih cienz daih baenz le “cietyihfan”.

Ngoenzciet, vunz Mulaj cungj youq baihnaj miuhcoj dap aen douhung baek rim nyefaex va-ndoeng ndeu, vunz daengx “doeng” doxcomz dwk guh gij hozdung caeqbaeq. Guh caeqbaeq gaxgonq, aeu dawz gij siengqveh 36 boux

saenzbaed venj youq gwnz ciengz dingdangz miuhcoj, mauhngeg baij hwnj gwnz daiz dajcuengq bae, lij genj aeu gij riengz haexcid cei raez, naedhaeux cei mbot haenx yungh sailaisaek cug baenz gaem venj hwnj gwnz ciengz bae; gwnz daizhung cungqgyang dingdangz baij rim duzcwz, duzvaiz aeu lwgbiek, lwgmaenz deu baenz haenx, caiq baij haexnaengj haj saek dem, seiqhenz baij miz lwgraz, duhhenj, batgak, sagieng, mbawcaz daengj 12 cungj nungz canjbinj caeuq gaeq, bit, bya, simdaezmou, daepmou daengj 12 cungj doxgaiq dajcuengq, aeu neix daeuj byaujsi loeg cuk hwnghuengh, nungz yiz muz fuyez funksou, mbouj lumz aencingz saenzbaed goengdaek goengcoj. Cietgingq hozdung miz cingjswng, diemjseng, yienqswng, ciengq saenz, habbing, soengqswng daengj cwngzsi, daengx aen yizsi youz song boux saegoeng guh swhyi, boux he gyauej daep mauhngeg, ndang daenj buhfap nding, din daenj haizcauj, cienmonz diuq foux cingj saenz gingq saenz, heuhguh “saegoengdiuq”, lingh boux saegoeng daenj buh bingzciengz, cienmonz ngonciengq gij gingfaenz cingj saenz gingq saenz, heuhguh “saegoengciengq”. Yizsi caeq saenz sat le dawz yienghvuq duzcwz duzvaiz caeuq riengzhaeux faen hawj gak ranz baema dajcuengq siuyieng, sojmiz vunz ndaw coengcug itheij gwnngaiz, ciengq go, yienjheiq, foux lungz foux saeceij. Gak mbanj gak ranz, bouxhek lai raeuh, gyoengq caencik baengzyoux nem beixnuengx minzcuwz wng geijcib leix gya haenx caemh foenfoen ganj daeuj angq hoh, camgya gij hozdung ngoenzciet, ndaw mbanj nauhyied raixcaix, angq nauh geij ngoenz geij hwnz, doengzcae angq hoh funksou bingzan, maq-muengh guek ak maenz fouq, saedceij vuenyungz.



▲ Lungzhaz ngoenzciet daeuj angq hoh, funksou vuenyungz doh gwnzbiengz.



▲ Guh yizsi caeqbaeq, mbaenj vunz lai vuenyungz.



▲ Gohaex ndaej funksou, gyoengqraeuz caen sim’angq. (Hoz Yiz ingj)



▲ Ngoenzciet beixnuengx caez caeqbaeq, gyo’mbaiq goengdaek goengcoj raeuz.



▲ Dahsau cangndang gyaue- getget, caez bae cetyouy hoh ciethieq.



▲ Beixnuengx Mulaj gaenx youh lingz, dinfwngz ndawbiengz cienz lai daih.



▲ Ngoenzciet gwn donq ngaiz- cienranz, beixnuengx Mulaj angq lai raeuh.

(Hoz Yiz ingj)



▲ Giuzcuk Mulaj lizsij nanz, seizneix ndawbiengz lij ciengz dwk.

(Hoz Yiz ingj)